



Igls victours digl turnier da golf cun igls organisatours dall'occurrnza tgi ò carmalo blera prominenza an Val Alvra: Hans Christoffel, Guido Anesini, Paul Accola, Noemi Anesini, Christina Rima e Peter Minder (da san.).

FOTOS G. N. STGIER

Gl'intent principal è da promover sportists giovens

Bogn d'Alvagni: Turnier da golf dalla Fundaziun Paul Accola

DA GION NUTEGN STGIER / ANR

■ **Persunalitads da sport, dalla cultura e dall'economia on paea ena somma considerabla per sa participar agl turnier da golf da sonda passada. Digl retgav da chel turnier profiteschan talents da sport tgi on igl potenzial da far carriera. Treis da chels tgi èn sen buna veia èn nias onoros.** Paul Accola è sto en skiunz popular betg angal percheigl tgi el ò gia success cunzont ainten las cursas da cumbinaziun, mabagn percheigl tgi el era pitost en tip original. Er schi el è sto egn tgi geva magari atgnas veias ò igl skiunz da Tavo gudagnea igl classamaint general digl cup da skis 1991/92. Per ansomma neir schi gliunsch aint igl circus da skis dovrigl betg angal talent, mabagn er sustigns da tottas varts. Paul Accola dei tgi er angal en pitschen ageid sapgta esser decisiv per la carriera dad en gioven sportist. Cun chel intent ò gl'antierour skiunz institua vant seis onns la «Fundaziun Paula Accola» tgi promova sportists giovens. Rimno daners per chella vign cunzont cun organisar occurrenzas noua tgi la prominenza da sport, dalla cultura e dall'economia s'inscuntra. Tar egna dalas occurrenzas impurtantas totga igl turnier da golf agl Bogn d'Alvagni noua tgi igl retgav da chel vo cumplet an favour dalla fundaziun digl skiunz tgi ò termino sia carriera igl 2005.

Noms ancunaschaints

Per sa participar agl turnier da golf paia en golfist 2500 francs, dastga persiva anvidar anc dus ancunaschaints agl tunier e ratscheva persiva er anc en padregn prominent tgi gioia communabel igl turnier. Gist 17 golfists èn sa mussos generous è paea per giuier a golf cun blers stars digl «HCD», antierours skiunzs ed anc blers oters prominents. Dalla parteida èn stos tranter oter *Arno Del Curto*, igl trenader digl «HCD», igls giuieders *Reto von Arx*, *Jan von Arx*, *Sandro Rizzi* e *Petr Sykora*. Cun *Dario Cologna* è sto dalla parteida er en victour digls gis olimpics 2010 e mantgea on er betg igls fardagliuns *Dominique Gisin* e *Marc Gisin* tgi appartignan agl cader da skis naziunal. Vasia agl Bogn d'Alvagni ins ò dantant er ena rotscha sportists tgi on durant onns gia bler success, scu per exaimpel l'antieroura skiunza *Maria Walliser Anesini*.

Radond 50 000 francs

Migra vess l'atmosfera betg savia esser er cun aveir la prominenza en bellezza de per dar a golf. Unisono on tots detg tgi seia daveiras en plascheir da giuier a golf sen chel plaz an Val Alvra. Cuntaint è er sto Paul Accola, igl iniziand digl turnier, la seira cura tgi el ò fatg bilantscha. Radond 50 000 francs ò igl turnier purto alla fundaziun tgi dat ossa gio seis onns. Chegl seia en bela somma per sustignier

er aint igl avigneir sportists tgi vessan igl talent per far carriera, vegian dantant betg igls meds finanziaals, ò accentuo Paul Accola. La fundaziun sustigna er adegna puspe instituziuns da sport e projects da sport aint igl Grischun. Egn digls puncts culminonts è alloura stada la rangaziun digl turnier da golf. Gudagena chel ò *Peter Minder*, igl commentatur da SF cun sies team, avant *Maria Walliser Anesini* e *Walter Vesti* cun sies treis partenaris.

Dus talents engiadines

Tranter la blera prominenza eran er dus delegaziuns pi grondas da Sent e da Zernez. Igl muteiv pertge tgi tants Engiadines èn nias an Surmeir è tgi ena sportista ed en sportist dalla Nagiadegna Bassa èn nias onoros. Chegl èn la skiunza *Arina Riatsch* da Sent ed igl passlunghist *Corsin Hösli* da Zernez. Arina Riatsch ò cunzont fatg furore tar igl Campiunadi svizzer dad «JO» 2011 cun gudagner gist treis medaglias dad òr. Scu la skiunza tgi totga tar egn digls gronds talents da skis ò er Corsin Hösli ratschet en premi doto cun 2000 francs. Chel premi ò igl passlunghist ratschet per sia viglia e sia perseveranza tgi el ò gia per survantscher sia malogna maligna ed uscheia pudia cuntinuar cun sia carriera sportiva. En ulterior premi doto cun la madema somma ò ratschet igl snowboardist *Jan Scherrer* da Tavo.



Dario Cologna (san.), victour tar igls gis olimpics 2010 e Not Carl, gl'antierour deuto engiadines.



Dattan betg angal bagn a hockey, mabagn er bagn a golf: Reto von Arx (san.) e sies frar Jan von Arx.



Er sa catts bagn agl Bogn d'Alvagni èn Monika Fasnacht, moderatoura da «SF» ed igl cabarettist Marco Rima.



Cuntaints paran er dad esser Paul Accola, (san.) e Gian Gilli.



Accumpagnea è igl talent da skis nia da sies genitours: Mario Riatsch, Arina Riatsch e Seraina Riatsch (da san.).